



WANTOK

Niuspepa Bilong Yumi Ol PNG Stret!

Namba 1834 Wan Wik, Oktoba 1-7, 2009 K1 tasol long olgeta hap



INSAIT

bemobile
Painim Bal Resis!!
Winim K100 na Bemobile Gift beg insait!!

Lukim nupela
STORI WANTAIM WANTOK pes 15

K20 milian stap bilong skulim ol ples manmeri - PES 3

Sapliment

60TH ANIVESARI BILONG RIPUBLIK BILONG CHINA

NIUS	P2-7
EDUKESEN	P9
HELT NIUS	P10
SIOS	P11
MERI	P12
ABC, WOL na PASIFIK	P13-14
KOMENTRI	P15
GLASIM MUSIK	P19
ENTATENMEN	P20
KOMIK na PILAI	P21
KANGE/PENPREN	P24
BISNIS	P25
RUREL INDASTRI	P26
SPOT	P27-32

Ol distrik bai bungim hevi

Paul Zuvani i raitim

OL ROT bai go yet long bagarap, ol skul bai pas, ol haus sik i nogat marasin na sindaun bilong manmeri bai nogut yet.

Kain sindaun bai go yet maski Gavman i tok orait pinis long go bilong K14 milion long wan wan distrik long Distrik Sevises Impruvmen Progrem (DSIP) bilong em.

Dispela em luksave bilong Opis bilong Rurel Developmen (ORD) bihain long em i holim ol kibung long wan wan

... DSIP mani no go aut

ol rijen long painim aut ron bilong dispela mani.

ORD i save givim aut dispela mani. Em i save givim aut mani long wan wan ol distrik bihainim projek plen wan wan ol Memba wantaim komiti bilong ol long distrik i kamap wantaim long ol hap we K14 milion bai go long em.


Gavman i brukim 7-pela hap long we K14 milion i mas go long em.

Dispela ol hap em trenspot infrak-

straksa rihebilitesen na mentenens (K5 milion); praimer i helt kea (K2 milion); besik edukesen (K2 milion); wara saplai (K1.5 milion); lo na jastis (K1.5 milion); Komyuniti bes projek (K1 milion) na rurel ilektifikesen (K1 milion).

Bikos long dispela hevi ORD i tok sapos Gavman i laik lukim kaikai bilong tingting bilong em orait bikpela senis i mas kamap wan wan ol distrik opis.

I GO MOA LONG PES 3



Bikpela rot long namel long biktaun eria Fagatogo bilong Ameriken Samoa em solwara i karamapim bihainim long sunami i kamap. Sunami i bin kirap bihain long bikpela guria i kamap aninit long biksolwara na i bagarapim ples long Ameriken Samoa na Samoa wantaim. Em i brukim ol haus na kilim samting olsem 34 pipel. (AP Poto i kam long AAP Images)



Toktok longpela taim long nait nau go Bikpela moa stret!

Ringim husat i gat Digicel mobail fon insait long PNG long 11-toea tasol long wanpela minit stat long 11-kilok nait, na nau igo inap 7-kilok moning! Na tu, salim text igo long husat lain igat Digicel mobail fon long 1-toea tasol namel long 10-kilok long nait na 7-kilok long moning.

Digicel

Dispela promosen i kam long ol Digicel kastoma tasol. Digicel Tems na Kondisen i stap.

OX & PALM BRAND

True Buli Bif Bilong PNG.

OX & PALM BRAND CORNED BEEF

NET WEIGHT 340g

NET WEIGHT 200g

Kaikai long stap gut

Andrew Molen i raitim

i kaikai nabaut.

"Kain ol samting olsem lem fleps, kakaruk na sips (we ol i kukim wantaim bikpela wel) bai bagarapim bodi bilong yu wan tu tasol taim yu daunim i go insait," Mista Wemin i tok.

Em i tok planti ol kaikai long stua, em yumi no save em i kam long we. Em i tok masin i save mekim sampela, na em i no gutpela.

"Yu mas kisim kaikai we i kam aut long graun stret, em kaikai tru we bai lukautim na strongim yu," em i tok.

Wemin i no namba wan man long kam aut na toktok long dispela hevi.

Bisnisan na bipo minista bilong helt, Sir Peter Barter tu i

save toktok long dispela planti taim.

Sir Peter tu i save toktok strong long ol manmeri mas kaikai moa lokol kaikai na lusim ol kaikai bilong stua.

Planti ol dokta na saveman bilong helt tu i save mekim wankain toktok.

Mista Wemin i no dokta o bikpela saveman bilong helt na kaikai, tasol spot bilong em long bodi bilding i skulim em long wanem kain kaikai na trening ol i ken kisim long lukautim bodi bilong em na wanlain bilong em.

Em i laik bai ol manmeri mas gat dispela kain save bai ol tu i ken lukautim bodi bilong ol na stap gut na amamas longpela taim.

Fact file:

Sampela ol kaikai we i gutpela long kaikai em;

Kaikai bilong kisim strong; Banana, kaukau, tapiok, rais, bret.

Kaikai bilong strongim blut na rausim ol sik; kumu, tomato, karot, bin.

Kaikai bilong groim bodi na strongim skin; Mit bilong ol bikpela abus, pis, sosis, kiau bilong kakaruk.

Sampela ol samting we yu noken putim planti tumas antap long kaikai na dring; Wel, gris, bata, suga, krim, salt.

Ol dring we i gutpela long dring; wara nating, wara bilong ol prut olsem muli na mango,

Provinsel gavman laik rausim ol setelmen

Sape Metta i raitim

PLANTI manmeri husat i save stap long ol setelmen long baunri bilong Goroka taun na lsten Hailans i wok long tinting planti nau bihain long ol i bin harim na lukim ol ripot long midia olsem provinsel gavman long namba wan taim stret long provins bai givim eviksen notis long ol lain husat i sindaun long graun bilong gavman long ol setelmen.

Na ol toktok em i stap pinis olsem ol setla i mas mov na lusim dispela ol graun bilong gavman long tu wiks taim.

Sapos nogat, ol polis opisa bai i go na rausim ol manmeri na ol hauslain long ol dispela setelmen.

Provinsel Edminsitreta Munare Uyassi i givim strongpela toktok i go long ol polisman meri long givim notis na long toksave tu long ol lain husat i sindaun long graun bilong gavman.

Provinsel Polis Komanda (PPC) Sif Inspekta Augustine Wampe i bin kisim dispela ol toktok na em i tok, "Mipela bai bihainim dispela ol toktok na givim notis i go long olgeta stelemen long Goroka."

Em i tok tu olsem polis bai helpim gavman long givim ol notis na bihain bai ol i stat long rausim ol lain long ol setelmen husat i no inap bihainim dispela ol notis.

Mista Uyassi i tok ol lain husat i save i stap long ol setelmen em ol i no save tingim gutpela sindaun bilong ol long helt sait.

Na tu ol setelmen em ol ples we planti bikhet pasin em ol yangpela long dispela ol eria we i save bringim hevi i go long taun.

Olsem na long dispela as, hevi bilong pasin bikhet na lo na oda em i go antap tru.

Em i tok long dispela ol setelmen - i nogat ol gutpela toilet suris na wara saplai sistem we bai mekim na laip bilong ol lain manmeri bai no helti na gutpela tumas we ol i ken kisim ol sik long kain laipstail em ol i stap long en.

Mista Uyassi i tok provinsel gavman i lukluk nau long givim ol eviksen notis long ol setla long Genoka, Warabung blok, Degis Blok, Pawa Pos, Piswara setelmen, Banana Blok, Mambu setelmen na ston krik setelmen long wara Zokozi.

Em i tok bihain long gavman na ol polis opisa i givim aut ol eviksen notis, ol bai karim aut eviksen long ol dispela setelmen.

Gavman mas tok klia long Kokopo BSA: TIPNG

TRENSPERENSI Intanesenel Inc. (TIPNG) i gat bikpela wari long ol plen we gavman i laik yusim K60 milion long LNG projek we i bilong ol papagraun.

Em i tok bipo long gavman i kamap wantaim ol tingting o plen bilong yusim dispela mani em i askim gavman long soim ripot bilong dispela mani bai pablik i ken save.

Em i tok dispela em mani i kam long ges projek we em na ol poroman bilong em i laik developim tasol mani i bilong ol pipel na olsem olgeta manmeri i mas save long stap bilong dispela mani.

Em i tok ol ripot bilong BSA we gavman i mekim long Kokopo na givim long Palamen na ol kampani long tok promis em i mekim.

Dispela tok promis i bilong ol papagraun long ol projek we bai kamap na long hamas mani em bai yusim long wan wan ol projek.

"Ripot bilong dispela olgeta plen, tok promis na mani we gavman i bin mekim i mas kamap ples klia bai olgeta manmeri bilong Papua Niugini i ken save."

"Ol pipel i mas save bai nogat asua i kamap long mani lus nating long ol kain kain saveman i kamap na givim tingting bilong wanem samting i mas kamap long dispela projek," Opis bilong TIPNG i tok.

Em i tok krai bilong ol manmeri long tok egens long sampela bilong dispela ol projek i soim klia olsem sampela samting i no stret.

Ol i kisim kot oda long pasim

kamap bilong ol kibung long tok bilong laisens bes agrimen (LBA).

Em i askim gavman long plen na karim aut gut dispela plen. "Dispela K60 milion i kam long we long fanim ol kibung bilong LBA?"

"Mipela i laik save inap long gavman i tok klia sapos dispela ol mani i stap insait long 2009 Mani Plen?"

"Dispela i narapela piksa bilong ol pasin gavman i laik lusim tasol mani na baim ol manmeri bai ol i amamas na em i skruim paul pasin bilong em."

"I luk olsem gavman I no save tok tru taim em i mekim kain bisnis olsem long LNG projek," siaman bilong TIPNG Peter Aitsi i tok.

Em i laik save sapos gavman i lainim kain pasin i kamap long Bogenivil.

Em i tok i tru gavman i ken paulim ol manmeri long mani na pasim maus bilong ol tasol dispela em bilong hap taim tasol.

Bihain dispela i pinis ol bai mekim samting i bikpela moa long dispela askim ol i mekim long gavman.

Em i tok sapos gavman i mekim samting stret long stat bihain olgeta samting i ken ron gut.

Em i tok wanem samting dispela projek bai bringim i kam long kantri bai wankain long gutpela sindaun bilong ol papagraun.

Na long dispela as gavman i mas tok tru na tok klia long olgeta samting long stat bilong projek.

Nominesen bilong Kandep bai ileksen

INAP olsem 15 kendidet i nominet long sanap resis long Kandep bai ileksen long Enga Provins.

Ol nominesen i pas long Trinde Septemba 23, 2009.

Memba husat i lus long kot we i lukim dispela bai ileksen Don Polye i wanpela bilong dispela ol 15-pela man.

Wantaim em em Alfred Manase, man husat i kotim Polye long kot bilong dispyuted ritens.

I nogat wanpela man i nominet. Olgeta I man tasol.

Bihainim tasol pinis de bilong nominesen Ekting Deputi Ilekterol Komisina John Kalamoroh i droim ol nem we ekting dairekta bilong ileksen Peter Malaifeope i witnessim.

Oda bilong ol nem na namba bilong ol kendidet i stap olsem:

NAMBA	BOKSA NAMBA	NEM BILONG KENDIDET
1	10	Peter Mision Yaki
2	11	Win Amos
3	12	Luke Alfred Manase
4	13	Kenneth Yonge Andrew
5	14	Lesri Mose Yaka
6	5	Don Pomb Polye



TRAIM GEN: Polye husat i lus long kot nau i traim gen long resis.

K20 milian stap bilong skulim ol ples manmeri

Neville Choi i raitim

I GAT K20 milian nau i stap bilong skulim ol manmeri i stap long ples, bai ol inap long kirapim wok bisnis bilong strongim ol komyuniti bilong ol. Moa long 90 pesen bilong olgeta manmeri long kantri i save stap long ples.

Nau Dipatmen bilong Leba na Industriel Rilesens i laik opim rot bilong moa long ol dispela lain manmeri bai ol i ken kisim skul na kirapim moa developmen long ples.

Aninit long developmen program bilong en, Independens Felosip

Skim (IFS), dipatmen i laik skulim ol manmeri husat i no pinisim gut skul o i nogat save bilong wok bisnis, long kisim skul long ol teknikal savemak na we bilong lukautim ol liklik wok bisnis na projek.

IFS em bipo em i bin ron aninit long nem Somare Skolasip, we Nesenel Eksekutiv Kaunsel i bin sanapim bilong painim na helpim wan wan ol manmeri husat i soim laik na strong bilong kisim save na givim bek long ol ples komyuniti bilong ol.

Narapela bikpela astingting bilong IFS em bilong strongim pasin na tingting bilong wok bisnis

long ples.

Bihain long IFS i bin kirap long 1978, em i halivim pinis moa long 2,100 manmeri bilong ples long kisim skills trening na teknikal sapot bilong kirapim o strongim ol ruel wok projek na bisnis bilong ol.

Nau aninit long K12 milian manimak gavman i skelim long IFS, 2010 bai lukim 600 moa manmeri bilong ples i kisim wankain sans bilong strongim sindaun bilong ol na komyuniti bilong ol.

Long lonsim bilong IFS long Tunde dispela wik, ol i luksave long tenpela lain manmeri husat i

sanap strong pinis bihain long ol i kisim save long program.

Wanpela man Isten Hailans, Barclay Kaupa i lukautim bisnis bilong mekim hani na sop.

David Minio, wanpela man Nuku em i wanpela vanilla bisnisan, na nau em i kamap LLG Presiden. Gibing Oboko, wanpela man Finsafen, i bin kisim trening long OISCA aninit long IFS, na nau em i wanpela trena husat i save raun na skulim ol arapela wanples bilong em long we bilong groim rais.

Mombi Onesimo, em i wanpela man Milen Be husat i kirapim Iko-

Turisim hotel bisnis bilong em yet. Em tu i kisim trening aninit long IFS na nau em i wok trenim ol arapela long provins bilong em.

Wanpela meri husat i kisim bikpela helpim tru long IFS em Miriam Pohakui, husat i skul long OISCA long Kokopo long 2008, na nau IFS i helpim em long kisim moa skul long Japan.

Lukim moa stori long IFS neks wik taim Wantok Niuspepa bai glasim wok bilong en.

OL BIKMAN: Praim Minista Gren Sif Se Michael Somare na pikini ni bilong em Betha i bin bungim Presiden bilong Amerika Barack Obama na misis bilong em Michelle long Wait Haus na kisim poto wantaim ol. Se Michael i bin raun i go long Washington long wanpela bikpela kibung. Poto: Lawrence Jackson



Ol distrik bai bungim hevi

I kam long pes 1

Long dispela em i tok ol asua i pas long go bilong DSIP mani i stap long tupela hap- wanpela em long politikel (ilektorel) na narapela em long distrik opis (ol gavman wokman).

Asua em olsem:

- OL Memba i laik mekim olgeta disisen long distrik;
- OL opisa bilong Memba i save laik kisim ples bilong ol distrik tresari opisa na mekim wok;
- PLANTI senis tumas long distrik etministreta o distrik tresari opis;
- NOGAT gutpela wokbung namel long ol wokman bilong gavman na lokol memba;
- NOGAT inap ol wokman o saveman bilong lukautim na raitim ripot bilong mani;
- NOGAT gutpela distrik na fainens opis long mekim wok;
- NOGAT gutpela rot o ol ples i stap longwe long narapela narapela na hat long bungim ol na givim sevis;
- NOGAT gutpela wokbung namel long Memba, ol distrik opisa na ol kampani we i raitim ol projek proposal;
- OL Memba i no save wok hariap long saining ol pepa long pe i mas kamap.

Stat long las mun ORD i wok long ronim ol wok-sop long wan wan ol rijen long painim aut ron bilong DSIP mani.

Long dispela wik em i ronim woksop long Divain Wod Yunivesiti bilong ol tresari opis long Momase rijen.

Em pinisim woksop bilong Sauten na Niugini Ailans rijen na long narapela wik bai pinisim dispela ol woksop wantaim ol opisa long Hailans rijen.

Rot bilong yusim gut DSIP mani

Paul Zuvani raitim

TINGTING bilong gavman long putim mani i go daun stret long ol distrik na kamapim ol wok i gutpela.

Tasol i gat ol hevi i stap we i pasim dispela mani long i go kamap long ol distrik.

Sampela bilong ol dispela hevi em planti ol distrik i nogat distrik tresari o fainens opis i stap. O sapos ol dispela opis i stap, i nogat wokmanmeri long wok insait long ol dispela opis. Na sapos ol wokmanmeri i stap, ol i nogat save bilong raitim ol fainens ripot, kamapim baset o mani plen na bihain mekim akwitel o tokaut long rot ol i yusim mani.

Em i wanpela askim bilong Opis bilong Ruel Developmen (ORD) long ol memba bilong palamen (MP) i mas go wan-

taim ol akwitel bai ol i ken kisim narapela hap mani bilong ol. Sapos ORD i no kisim akwitel long ol MP, ol i no inap bai nogat mani i go aut long skruim Distrik Sapot Impruvmen Program (DSIP).

Bihain long ol kibung ORD i holim long sampela rijen long painim aut wok bilong ol distrik long kisim dispela mani, ORD i luksave long dispela ol hevi.

Bikos long dispela ORD i mekim sampela ol askim long larim mani i go aut isi:

- ORD i mas mekim moa aweanes long tokaut na tok klia long ol manmeri long ol rot aninit long lo long bihainim long kisim na yusim dispela mani olsem ol distrik i save long wok bilong dispela mani;
- I MAS i gat gutpela toktok i go i kam namel long ol lain

husat i pas long DSIP mani;

- Skulim moa ol savemanmeri bilong tresari na fainens long kamapim ripot na lukautim ripot bilong mani; na
- GLASIM gen ol rot long mekim isi long DSIP mani long go long ol distrik.

ORD i painim olsem planti ol distrik i wok hat long bihainim ol rot long kisim K14 milion DSIP mani. Sampela i save moa long ol arapela long rot kisim DSIP mani.

Sampela distrik i painim hat long karim aut DSIP bikos long sampela samting i hat long kisim. Sampela distrik i bungim hevi namel long politik opis na pablik sevis wokmanmeri long distrik.

Gavman long 2007 Saplimentari Baset i givim K4

milion, long 2008 Mani Plen i givim K6 milion, na long 2009 Mani Plen i givim narapela K4 milion. Bungim olgeta dispela mani wantaim i kamap long K14 milion.

Charles Okuri bilong Madang Provinsel Tresari Opis i tok dispela em i bikpela mani tru long go daun long distrik.

Em i tok ol distrik bai bungim bikpela hevi long sait bilong ronim dispela mani.

Mista Okuri i tok olsem long lukim dispela mani i go gut gavman i mas skulim ol fainens opisa, painim haus bilong ol, wokim opis na kamapim gutpela sevis long ol distrik long mekim ol pablik sevis wokmanmeri i amamas long i go wok long ol distrik.

BATTERY CHARGERS

Jump Start 1500



K979.00

Autostart 300



K1,500.00

Automatic 12



K1,100.00

Progress 8



K240.00

Progress 35



K1,500.00



BISHOP BROTHERS
everything for industry...

www.bishopbros.com.pg

PORT MORESBY | LAE | PORGERA | MT HAGEN | MADANG | KIMBE | RABAU | VANIMO | HONIARA

PNG kisim sapot long REDD

I GAT bilip long tingting bilong Papua Niugini (PNG) long Redus Emisen bilong Diforestesen na Degredesen (REDD) i kisim tok orait long kamap long bikpela klaimet senis kibung long Kopenhagen (Copenhagen), Denmark (Denmark) long Disemba.

REDD i tingting bilong daunim kamap bilong smuk nogut i go antap long klaut na pasin bilong katim na bagarapim bus nating.

Praim ministra Gren Sif Se Michael Somare i kisim dispela sapot taim em i bungim ol lida

bilong sampela kantri long klaimet senis kibung long Nu York (New York) long Amerika (United States of America) las wik.

Se Michael i bin bungim ol lida bilong Kongo (Congo), Australia, na sampela ol Pasifik kantri.

Kongo long Afrika (Africa) i gat namba tu bikpela bus long wol bihain long Brazil. Indonesia na PNG i namba tri na foa kantri long ol i gat ol bikpela bus.

"Mipela i gat longpela rot i stap yet long lukim REDD i kisim tok orait long Kopenhagen kibung," Se Michael i tok.

Em i tok olsem ekting dairekta jenerel bilong Opis bilong Klaimet Senis, Dokta Wari lamo, wantaim tim bilong em, bai i go pas long redim ol wok bipo long PNG i go long Kopenhagen long Disemba.

"Mi askim olgeta lain husat wok bilong ol i pas long klaimet senis long mekim ol wok we i kamap long tingting bilong mipela," Se Michael i tok.

Em i tok em i amamas long sapot em i kisim long REDD long ol lida bilong ol kantri.



AMAMAS: Se Michael i amamas long sapot em kisim long ol narapela kantri long REDD program.

Meri bosim Agmark Bogenvil



BOSMERI: Claire Toboen.

Veronica Hatutasi i raitim

WANPELA meri i kamap bos bilong wanpela biknem kampani long Bogenvil we i save baim na salim kakau ovasis.

Nem bilong kampani em Agmark PNG Limitet, na nem bilong meri husat i kamap bos bilong en em Claire Toboen.

Claire i bilong Tinputz long not Bogenvil. Em i bos bilong han bilong Agmark long Kokopau, long narapela sait bilong Buka Pasis.

Agmark Buka i gat tripela han na moa long 30 wokmanmeri. Claire i bos bilong olgeta dispela wokmanmeri. Tripela han em long hatwe han we ol i salim ol samting bilong wokim haus, ol marasin bilong lukautim ol kakau, ol kumu na ol arapela gaden kaikai. Siping em narapela han, na las han em bilong baim kakau na ol arapela wok bilong lukautim kakau.

"Kampani i gat planti ol man i wok long en tasol i no planti meri.

"Mi amamas long ol man i wok gut wantaim mi na givim mi gutpela sapot.

"Tru, i gat ol salens tasol i gat rot long stretim ol hevi i stap," Claire i tok.

Em i tok em i wok 9-pela krismas na em i amamas long wok.

"Ol salens i mekim mi strongpela moa," Claire i tok.

Claire i bin stat wok wantaim Agmark long 1998. Pastaim em i bin wok wantaim Westpac benk na bihain wantaim Rabaul Batri Sevis long Rabaul, Is Nu Briten provins.

Muvi man amamas long voluntia wokman

CHARLEY Boorman, muvi man husat i save kamap long televisin program 'Charley Boorman, Sidni i go long Tokyo long kain kain rot', i amamas long ol manmeri bilong Ingran (England) husat i wok voluntia long Papua Niugini (PNG).

Mista Boorman i soim na tokaut long amamas bilong em taim em i bungim Voluntia Sevis Oganaisesen (VSO) wokman Marcel Pool long Goroka, Isten Hailans provins las wik.

Mista Pool i wanpela voluntia long wok bilong pisioterapi (physiotherapy) husat i no longtaim i go pinis i kisim

Mista Boorman wantaim muvi tim bilong em i go long Maun Zion Aipas (Blind) Senta long Goroka.

"Taim mi bungim Marcel long PNG, mi no save wanem samting tru em dispela VSO man bai givim long mipela.

"Mi kirap nogut long laik na amamas bilong Marcel na long wok em i mekim.

"Mi ting em i gutpela samting taim ol manmeri i lusim gutpela sindaun bilong ol na givim sevis long ol manmeri husat i laikim bikpela helpim," Mista Boorman i tok.

Ekting Hai Komisina bilong Briten long PNG, Colin Glass, i tok VSO i wok yet long

bringim na strongim tingting bilong ol manmeri long kamapim gutpela wok, sindaun na laik bilong ol.

"Long laik hap bilong PNG yu bai painim ol VSO olsem Mista Pool i tokaut na strongim tingting bilong ol manmeri long komyuniti long kamapim gutpela gutpela senis," Mista Glass i tok.

Mista Boorman i tok olsem long luksave long wok bilong Mista Pool na VSO, BBC2 bai soim wok bilong Mista Pool na VSO long wanpela program bilong en.

Narapela wok Mista Pool i save mekim em skulim ol lokel wokmanmeri long Goroka Bes

Haus Sik na helpim tu wok bilong pisioterapi yunit long haus sik.

VSO (PNG) kantri menesa, Karen Simmons, i amamas long Mista Pool husat i wanpela bilong ol 60 voluntia husat i wok long PNG.

Long dispela taim inap olsem 1600 VSO i wok olsem voluntia long 42 kantri long wol. PNG i wanpela bilong ol dispela kantri, Mista Simmons i tok.

TV so bilong Boorman bai kamap long BB2 long Oktoba o Novemba samting na tu bai i gat buk na DVD bilong dispela ol piksa na toktok.



SAPOTIM WOK: Mista Boorman (name) wantaim TV tim bilong em i sanap wantaim wanpela aipas mangi long Maun Zion Aipas Senta. Foto: Hai Komisina bilong Briten

Pekpek long suris kilim manmeri long Goroka

Sape Metta i raitim

PLANTI ol manmeri na ol pikinini tu husat i save i stap klostu long suris dam na plen (sewerage dump and plant) long Fimito eria we i stap ausait tasol long Goroka, Isten Hailans i bin kisim na wok long kisim yet ol sik long smel bilong ol pekpek na planti long ol i dai pinis long las tripela ten yia.

Na i nogat wampela samting em ol atoriti long Goroka i mekim long dispela ol lain husat i bin lusim laip bilong ol long dispela ol sik.

Mekim olsem na wampela viles komyuniti lida, Francis Yarokove, husat i go pas olsem mausman bilong moa long 5,000 ol manmeri long ol hauslain na setelmen long Fimito.

Dispela hap eria we bikipela ol paip bilong suris i save go daun long en i kamap na pasim dispela suris long wanem ol pekpek long dispela suris i bagarapim pinis planti ol manmeri na pikinini long ol yia i go pinis.

"Olsem lidaman long dispela eria, mi gat olgeta rait long pasim dispela suris plent na damp long wanem em i bagarapim pinis laip na sindaun bilong planti ol lain manmeri na ol pikinini tu long dispela eria.

"Na sapos ol lain husat i stap long atoriti em Goroka Eben LLG na provinsel gavman tu i no inap long kamap na stretim gut dispela plent na damp eria na tu ol lain husat i kisim bagarap long ol sik na tu lusim lap bilong ol - orait dispela suris na damp em i mas pas olgeta na i stap olsem i go inap ol i kamap wantaim sampela tingting long stretim olgeta samting pastasim orait bai mipela i larim suris eria long open na operet gen," Mista Yarokave i tok.

Em i tok, "Inap em inap long wanem gutpela sindaun na kaikai sekyuriti bilong ol lain manmeri em i bagarap."

Mista Warigiso i tok faivpela taim long helt ripot em Goroka taun atoriti na Helt Dipatmen i kamapim i soim olsem dispela suris plen em inap long pas long taim yet.

Na fopela taim em ol manmeri i bin pasim tasol ol opisa bilong

Eben LLG i save kamap na peim aut K3,000 long ol i ken opim gen dispela suris plen.

"Nau yet mipela i yusim ol sen, olupela bruk bruk kar na ol hap hap ain long pasim dispela suris. Na mi i no wari sapos ol opisa bilong gavman i kisim mi i go long kalabus. Mi i gat bikipela wari tru long ol lain bilong mi long wanem ol atoriti i wok long tritim ol olsem ol animol," Mista Warigiso i tok.

Em i tok ol pik tu em ol lain long haus na viles i save lukautim em ol i save raun i go long dispela suris eria na tanim tanim antap long ol pekpek na rabis.

Mista Warigiso i tok ol lida long nesenel level i no lukluk long ol hevi em ol lain bilong em i wok long kisim.

"Saps ol i save lukluk na stretim ol hevi we ol lain i save kisim long ol marasin nogut em ol maining kampani i save kapsaitim i go long ol bus na wara bilong ol, orait olsem wanem long Goroka?" Em i askim.

Mista Warigiso i tok i no long taim i go pinis Goroka Taun Menesa Yangao Uyassi i bin tokaut olsem nesenel gavman i givim pinis K9 milien bilong kari-maut ol wok long apgradim na stretim gut dispela taun suris sistem. Dispela mani em bai no inap tromoi long ol arapela wok.

Tasol kirap nogut, Mista Uyassi na ol opisa na lida bilong em i tromoi planti tausen kina long baim ol fo wil draiv kar long dispela mani em nesenel gavman i givim long mekim wok bilong suris sistem.

Wantok Nius i bin i go lukluk raun tu long dispela suris eria na i toktok wantaim ol lain wokman bilong taun atoriti husat em ol i save kapsaitim ol pekpek na wasim ol blek baket long olgeta de bilong wik.

Dispela ol wokman i tok ol i bin mekim dispela wok moa long tupela ten yia. Wok ol i mekim em i no gutpela wok na pe em ol i save kisim em i daun tru. Na long taim ol i mekim ol i wok long rausim wasim na klinim pekpek ol i no save putim on ol sefti gia olsem ol hen glav, mask, gam but, ovarol na putim tu ol protek-sen marasin long ban-

isim ol yet long ol sik.

Dispela i mekim na sampela long ol i kisim ol sik na i dai pinis. Na atoriti i no mekim wampela samting long baim ol sefti gia na tu apim pe bilong ol.

Em i taim nau long Goroka taun atoriti na eben LLG i mas kamap

wantaim gutpela tingting long putim i go long apgradim na stretim ol sik taun suris sistem na tu stretim gut ol wokman bai ol i ken amamas na mekim wok bilong ol na givim gutpela sevis long ol lain husat i save yusim ol blek baket toilet.



NOGAT INAP BANIS: Ol wokman bilong Goroka Eben LLG i wok long wasim na klinim ol blek baket long taun suris plen long Fimito. Wampela bilong ol i putim sampela sefti gia na narapela em i no putim wampela samting bilong wok na em inap long kisim sik na ol disis long dispela wok. *Poto: Sape Metta*

"READY WHEN YOU ARE" ...

Features:

- CDMA 2000 1x Technology
- 200 phone book memory
- SMS (coming soon)
- Schedule
- Alarm Clock
- Data service/internet connection

RRP K55

Access
just connect

TELIKOM

Enquire now at your nearest Telikom business office

Lukluk raun wantaim Wantok



SANAP SORE: Kapal Haus bipo em hetkwata bilong Westen Hailans provins i paia pinis na i sanap sore i stap.



REDIM MANI: Ol lain pipel long Tauruba viles long Rigo, Sentral provins i redim ol mani long mambu long baim meri. Ol i bin kamapim olsem K20, 700 long baim meri long dispela seremoni long las wik Sarere. *Poto: James Kila*



DIVELOPMEN I STAP: Moa nupela divelopmen i wok kamap insait long Hagen siti olsem dispela nupela ANZ Benk bilding namel long siti. *Poto: James Kila*



REDIM KAIKAI: Wanpela famili long Tauruba viles em Rubutau Mega i redim bet kaikai long givim i go long narapela lain long seremoni bilong baim meri. *Poto: James Kila*



SALIM BILUM: Ol pes bilong salim bilum long Kagamuga ples balus long Hagen i wetim ol kastoma.



PULIM LAIN: Gavman potnait long Maun Hagen siti i bisi tru na ol dispela kastoma i sanap yet long lain long go insait long BSP Benk.

Nupela helt senta op long Yariya long Lowa Mendi

James Kila i raitim

OL MANMERI bilong Yariya long Lowa Mendi lokel level gavman (LLG) long Sauten Hailans provins, i amamas long wanem ol i gat wanpela nupela helt senta long hap bilong ol.

Moa long 20,000 manmeri husat i save stap long ol boda ples long sait bilong Imbonggu, Kagua-Erave na Nipa Kutubu, husat i laikim tru ol helt sevis, i amamas bihain long tupela

nesenel lida bilong ol i helpim long wokim dispela helt senta.

Dispela helt senta ol i wokim wantaim mani mak olsem K1.5 milion na ol i kolim Agiru-Awesa Helt Senta.

Gavana bilong Sauten Hailans provins, Anderson Agiru, na Mema bilong Imbonggu, Francis Awesa, wantaim AusAID, i putim mani wantaim long wokim dispela helt senta.

Wok i bin pinis long dispela helt senta i no longtaim i go pinis. Dispela helt senta i gat

ples bilong ol mama save karim pikinini, tupela aut-pesen wod na wanpela jenerel aut-pesen.

Dispela helt senta bai givim sevis long 5-pela wod kaunsil long Lowa Mendi LLG na tu ol manmeri long ol distrik bilong Kagua Erave na Nipa Kutubu.

Pastaim long opim bilong dispela helt senta, ol manmeri long dispela ol hap i save ron long-pela rot tru i go long Mendi jenerel haus sik long kisim ol medikel sevis.



NUPELA: Agiru-Awesa Helt Senta long Yariya.

Ol sumatin kisim gutpela stat long HIV/AIDS edukesen

JAMES KILA na NICKY BERNARD i raitim

OL SUMATIN na ol tisa insait long PNG nau bai gat sans long kisim ol gutpela infomesin insait long wanpela teks buk na ol tising samting long HIV/AIDS na STI o ol seksual transmetit disis.

Dispela nupela teks buk we ol i kamapim em i gutpela long PNG Pesenel Developmen skul buk na Australia Hai Komisina, Chris Moraitis wantaim Seketeri bilong Edukesin, Joseph Pagelio i bin putim kamaut ples klia long Badihagwa Sekendari skul long Hanuabada viles long Nesenel Kapitel Distrik long Tunde long dispela wik.

PNG Dipatmen ov Edukesin wantaim sapot bilong Gavman bilong Australia i bin baim moa long 18,000 ol text buk ya na ol

narapela samting long yusim long klasrum long yusim. 40 ol samting bilong yusim long laibri long ol skul em ol i salim i go aut pinis long ol praimer na sekendari skul long PNG.

Dokta Pagelio i tokim ol sumatin na tisa long Badihagwa Sekendari skul na tu ol sumatin bilong Hagara praimer skul husat i bin go tu long lukim dispela seremoni olsem Edukesin Dipatmen i wok long wok hat tru long sapotim ol tisa na ol skul long tising ol sumatin long HIV/AIDS edukesen na HIV/AIDS i mas kamap olsem wanpela skul bilong ol tisa taim ol i kisim trending long ol koles.

Dispela bai mekim ol tisa i save gut long ol samting long skulim ol pikinini na dispela program i ken kamap long planti skul insait long kantri.

"Edukesen em bikipela sam-

ting tru long helpim long daunim birua bilong HIV/AIDS.

"Planti ol intanesenel stadi i soim olsem taim ol pikinini i kisim gutpela edukesen, ol bai save long ol birua na pret long HIV/AIDS," Dokta Pagelio i tok.

Em i tok olsem ol dispela skul buk em i gat planti ol gutpela infomesin na ol skul na sumatin i mas lukautim gut ol dispela buk.

Hai Komisina bilong Australia, Mista Moraitis i tokim ol sumatin olsem dispela ol text buk i givim gutpela lukluk i go pas na i ken givim gutpela tingting long ol sumatin long ol salens we HIV/AIDS i save kamapim.

"Dispela i min olsem ol yangpela bilong PNG long bihain taim bai gat gutpela save long ol salens we HIV/AIDS i ken putim bikipela was agensim dispela sik," Mista Moraitis i tok.



TENKYU TRU: Tupela gret 9 sumatin Lorraine Gabina wantaim Georgina Makabe i sanap soim nupela buk wantaim Hai Komisina bilong Australia, Chris Moraitis. Foto: Nicky Bernard

Bogenvil makim 10 yia Edukesen rot

ATONOMES Rijen bilong Bogenvil i lonsim ten yia edukesen plen bilong taun dispela wik Mande.

Buka em i bin kirap long Mande moning taim ol sumatin na pablik manmeri wantaim i bung long Is Nambis long lukim kirap bilong dispela plen.

Plen buk em ol i karim i kam sua long nambis long wanpela spesol kanu kirap Bogenvil yet ol i kolim "mona" na i makim karim bilong edukesen long taim bipo na i kam long tude na makim kos bilong tumora.

Bogenvil em i namba 14 provins long olgeta provins long kantri long lonsim provinsel edukesen plen bilong em.

Namba wan bikipela het tok bilong dispela ten yia plen em "Kamapim gutpela Bihain Taim" (long tok inglis em Achieving a Better Future).

Em i makim ol astingting gavman bilong Bogenvil i laikim long

kamapim developmen na karim ol edukesen sevis i go long rijen.

Minista bilong Edukesen, James Marape i givim luksave long ol tisa long strong na bilip bilong ol long karimaut ol edukesen sevis insait long Rijin.

Em i tok namba wan bikipela wok developmen insait long kantri em strong bilong ol manmeri bilong en.

Mista Marape i tokaut tu olsem Somare-Temu gavman bai klostu lonsim Yunivesal Edukesen Plen bilong en bai olgeta pikinini long kantri i ken stap skul pastaim long 2015.

Em i tok makim plen olsem rot map i go long kamapim gutpela developmen long edukesen long Bogenvil.

Wok patnasip o wokbung em i mas stap long olgeta level.

"Sapot bilong komyuniti i mas stap long wanem em i save strongim ol sumatin long wok

strong na bihain kam bek gen long sapotim skul bilong ol," em i tok.

Edukesen minista i askim ol bod bilong skul long helpim na yusim gut ol skul fi sabsidi.

Insait long narapela 10 i go 20 yia, samting olsem K10 bilion bai mas stap bilong stretim bek ol skul i stap nau. Em i askim ol lokol level gavman long skelim gut K1 milion aninit long Distrik Sapot Gren bilong ol.

Long taim em i givim toktok bilong em, Mista Marape i tok promis long skelim K5 milion i go long wanpela wokbung namel long nesenel gavman na Bogenvil gavman.

Em i tok long dispela K5 milion, K1 milion bai go long ol skul long Not Bogenvil, narapela K1 milion bai go long Sentral Bogenvil, na K1 milion bai go long strongim EQUITYV progrem. Narapela K1 milion em gavana bai yusim long



LONSIM: Edukesen Minista Marape i lonsim nupela edukesen plen bilong Bogenvil.

strongim moa wok edukesen long rijen. Rijinel Mema bilong Bogenvil, Fidelis Semoso i askim ABG long givim sapot long apgredim savemak bilong Bogenvil insait long kantri.

Mista Semoso i salensim Minista Marape long helpim rijen long sanapim tupela teknikal

skul long Bogenvil.

Deputi Sekreteri bilong Stendats, Damien Rapese, i tok Bogenvil i bin strong na kam bek bihain long 10 yia pait insait long provins, na nau i gat plen i stap long strongim save bilong edukesen bilong ol.



Pasin resis i nogat gutpela kaikai

YUMI glasim buk bilong revelesen insait long Nupela Testemen, yumi bai ritim sampela ol tok i stap em Bikpela i mekim long 7-pela sin i bin i stap long taim bilong ol aposol.

Dispela ol tok i sut long ol sios i stap long PNG tude. Long wanem, sios bilong PNG i gat bikpela hevi i stap na yumi no mekim stretpela wok bilong God.

Kainkain paul pasin, tok giaman, pasin stil, paulim bilip manmeri bilong narapela sios na pasin bilong daunim na givim kainkain tok giaman long narapela sios we em i kamapim bikpela hevi long dispela kantri na pasin bilong laikim narapela i nogat.

Orait, yumi glasim (Rev 2:1-7). Dispela tok i sut i go stret long ol sios bilong Efesus. Sios bilong Efesus i strong long bihainim olgeta kain lo na pasin ol kristen bilip, tasol ol i lus tingting long pasin bilong laikim ol arapela em i namba wan pasin ol i nap holim strong long wanem pasin bilong laikim na givim bel isi em i winim namel tru na i save bungim olgeta samting wantaim sapos i nogat gutpela na laikim pasin i stap long bel bilong pipel. Orait olgeta arapela pasin i kamap samting nating.

Sios bilong Efesus i no moa stap. Tasol tude, yumi lukim planti ol kainkain sios long PNG tu i mekim wankain ol pasin olsem sios bilong Efesus i bin mekim bipo.

Yumi lukim pasin bilong daunim ol arapela sios, pasin bilong grisim na pulim ol memba bilong arapela sios na pasin bilong tok 'Sios bilong mipela i kamap nambawan na bikpela tru nau i stap.

Na ol sios i mekim ol pipel long siti, taun na ples i bruk nabaut. Sapos yumi gat dispela tingting bilong wok resis i kisim ol manmeri i kam insait long ol sios bilong yumi, dispela i soim tru olsem yumi nogat trupela laik pasin bilong Bikpela na long ol kristen brata na long arapela pipel.

Em olsem wanem, yumi fulfilim vokesen bilong yumi o yumi mekim ol i paul na brukim ol pipel bilong God.

Em i gutpela salens na wanwan sios i mas glasim na mekim wok stret olsem gutpela wasman bilong sipsip olsem Jisas yet.



GIVIM BLESING: Pop Benedict bilong Katolik sios i save mekim wok bilong blesim ol nupela bisop bilong sios. I no long taim i go pinis, em i bin go pas long bikpela misa long Vatikan long givim blesing long ol nupela bisop bilong Katolik sios long Rom. - (AAP Images)

Strongim kaunseling na lusim gan

Veronica Hatutasi i raitim

KAUNSELING na rihabilitesen o wok long stretim tingting bilong man na senisim laip na sindaun i wanpela bikpela samting Katolik Sios long Bogenvil i mekim long helpim planti yangpela na ol narapela manmeri husat i kisim bagarap long Bogenvil hevi.

Bisop bilong Bogenvil, Henk Kronenberg i autim dispela tingting em na Katolik Sios i gat long en bilong helpim ol yangpela pipel tude.

Em i tok olsem na Katolik Sios i gat ol program em i ranim long helpim pipel olsem Kaunseling Sevis, Famili Laip program na Rihabilitesen Senta we ol Sistas bilong Nazaret (CSN) i ranim long Sabai long Buka.

"Bikpela wari i stap nau long ol yut long wanem bikos long pasin ol i mekim na kamapim ol trabel na bagarapim sindaun insait long famili na komyuniti taim ol i kisim strongpela dring olsem hombru na nau, mariwana spakbrus.

"Pipel i mas i gat kaunseling



WARE: Sios i gat wari long ol yangpela pipel olsem sampela ol yangpela pipel long Bogenvil hia. Dispela Gret 8 sumatin bilong Monoitu Praimeri skul long Siwai i lainim nupela samting olsem yusim Intanet sevis. Nau ol i wetim taim bilong ol long go sindaun taim wanpela grup i yusim ol kompyuta na lusim. Poto: Veronica Hatutasi

bikos planti i stap long hevi bihainim pait long Bogenvil. Planti pikinini na yangpela nau em mama i karim ol long taim bilong hevi na ol i no save long gutpela sindaun na pasin. Planti lain i holim ol gan i stap yet long saut olsem long Buin na Siwai. Na

dispela liklik lain i wokim bikhet pasin i mekim ol samting i hat long planti i laikim gutpela sindaun na ol wok go het i kamap long eria. Olsem na gutpela sindaun i no stap long planti ol komyuniti insait long sampela eria bilong saut Bogenvil.

"Pret pasin na vailens o pasin long kros na paitim nogut na kamapim bagarap long bodi bilong narapela wantaim gan na ol naip samting i kamap planti nau," Bisop Henk i tok.

Olsem na em i tok Katolik Sios nau em i strongim na go hetim ol kaunseling na rihabilitesen sevis program.

Bisop Henk i tok tu olsem long Bogenvil i gat trupela gutpela sindaun, rausim ol gan na pasin i mas senis.

Tu pastaim, ol atoriti i mas wok bung na stretim vailens, troma o tingting i no stret bikos long hevi na wari Bogenvil hevi i kamapim na pasin i wok long kamap bikpela long kisim mariwana.

"Strongim rausim ol gan long Bogenvil Pasin i mas senis. Bihain long hevi, pasin bilong nogat luksave (respect) na wokim nogut long ol meri i kamap bikpela. Narapela em sampela man i wok long kisim moa long wanpela meri. Dispela i no gutpela na i wok long bagarapim ol famili insait long Bogenvil. Na ol man i mas lusim dispela pasin," Bisop Henk i tok.

Spakbrus i kamap bikpela hevi long Bogenvil Katolik sios i wari

Veronica Hatutasi i raitim

BOGENVIL nau i lukim olsem spakbrus i wok long kamap olsem bikpela hevi namel long ol yangpela pipel na bagarapim sindaun long komyuniti na ol famili. Olsem na Katolik Sios i karimaut ol edukesen awenes program long helpim ol yangpela pipel.

Bisop Henk Kronenberg bilong Bogenvil i autim dispela wari bilong em. Em i tok mariwana o spakbrus hevi em i nupela samting long Bogenvil i wok

long kam insait nau we sios na ol atoriti long ailan i mas wok bung wantaim long daunim.

"Sios i laik kirapim paionia awenes program long ol spakbrus na mariwana. Kain program sios i gat pinis long Fiji na Solomon Ailan. Aninit long dispela program, wanpela yut o man i mekim tok promis tok promis olsem em i noken dring na makim taim long en. Dispela i kam aninit long Spirituel program na tok promis i mas go wantaim preia," Bisop Henk i tok.

Em i tok long karimaut dispela

program, bai ol i trenim sampela lain kaunseli.

Bisop i wari tu long vailens i kamap bikpela tude long Bogenvil insait long ol famili, pasin bilong kisim spakbrus mariwana na strongpela dring.

Mariwana i no kam long Bogenvil long ausait, nogat. Em i gro long Wakunai eria antap long ol maunten ples we i kol na mariwana plent i kamap gut.

Narapela samting we Bisop Henk i lukim olsem i kamap bikpela bihain long Bogenvil hevi em vailens o paitim na mekim

nogut long ol meri insait long famili.

"Famili hevi i go bikpela bihain long Bogenvil hevi. Bipo, dispela pasin i no save kamap long Bogenvil. Mi stap wok namel long ol pipel bilong Bogenvil long 44 krismas na mi no save lukim dispela kain pasin i kamap inap nau bihain long Bogenvil hevi. Olsem na sios i strongim Famili Laip na kaunseling program we Pater Henry Saris na Alina Longa i go pas long en aninit long Famili Laip Sevis program long Hahela long Buka.

Senisim pasin bilong sindaun na helpim yu yet

Veronica Hatutasi i raitim

WANPELA samting we i kamapim wari nau na i mas senis long Bogenvil em pasin long ting olsem man i sindaun nating na ol ausait lain bai givim ol helpim long mani samting long stretim laip na sindaun bilong ol.

Bisop bilong Bogenvil, Henk Kronenberg i tok. Bisop i stap wok namel long ol Bogenvil pipel long 44 krismas na em i save gut long laip, sindaun na pasin bilong

ol pipel bilong em.

Pasin i mas senis. Bihain long hevi, planti pipel i kisim dispela pasin olsem ol bai sindaun wetim ol ausait lain i go givim ol helpim. Dispela em bikos long helpim mani samting we ol bikepla intanesenel ogenaisesen olsem Yunaitet Nesens developmen Program (UNDP) na AusAID i save givim long en. Long sampela rot, dispela i gutpela tasol long ol arapela rot, em i no gutpela bikos dispela i mekim ol

pipel i les na sindaun wetim helpim i kam long ol narapela. Dispela tu i mekim wok bilong sios i hat bikos mipela i nogat mani," Bisop Henk i tok.

Wanpela eksampel o tok piksa we Bisop Henk i givim long en em pipel i sindaun long sampela kos o woksop sios i kamapim.

"Bipo long Bogenvil hevi, ol manmeri i save go sindaun long ol trening woksop i no save askim long peim ol o givim ol alauwens. Tasol nau, man o meri i lain sin-

daun long woksop i askim long alauwens mani long stap insait long kos, long baim kaikai, trenspot nap les bilong slip alauwens mani.. Bikpela senis tru i kamap na samting i kamap olsem wanpela bisnis. Pastaim, wok volantia na pipel yet i mekim samting long helpim ol yet i bin stap strong. Olsem na i moabeta long pipel i senisim pasin bilong ol, glasim ol samting na kisim ol gutpela tasol rausim ol dispela i no gutpela," Bisop Henk i tok.



KOMENTRI

Skulim ol manmeri na kirapim ples

SAPOS yu givim kaikai long wanpela man, bai em i kaikaim dispela kaikai, na bai kaikai bilong em i pinis. Tasol sapos yu skulim em long painim kaikai bilong em yet, bai em i no inap sot long kaikai long laip bilong em.

Dispela hap tingting, em planti manmeri long wol i save wok bihainim, na ol i save givim stia tok bihainim.

Yumi long PNG tu i mas bihainim dispela kain tingting.

Sapos gavman i laik kirapim ol ples manmeri na bringim developmen i go daun long ol ruel eria bilong yumi, ol i mas bihainim dispela tingting tu.

Tunde dispela wik i lukim lonsim bilong Independens Felosip Skim.

Dispela skim em i wanpela program we praim minista Gren Sif Se Michael Somare yet i bin kirapim long taim em i bin kamap praim minista namba wan taim.

Aninit long dispela program gavman i save givim sans long ol wan wan ol manmeri bilong ples bilong kisim moa skul na strongim save bilong ol bai ol i ken yusim bilong kirapim komyuniti na ples bilong ol.

Astingting bilong dispela felosip program em i gutpela. Tasol long ol yia i kam painim dispela wik we ol i lonsim gen, i no bin i gat inap luksave long en.

Nau, gavman bilong Chief i luksave olsem sapos em i laikim bai olgeta liklik hap kona long kantri i mas kirapim wok developmen, dispela felosip program i mas sanap strong.

Long strongim em, gavman i makim pinis K20 milian i go long opim rot na tingting bilong planti moa manmeri bilong ples, husat i gat strong na bilip olsem ol i ken kisim nupela skul na save bilong halivim ol lain komyuniti bilong ol.

Sapos yumi skelim strong bilong dispela program, wantaim narapela bikpela program gavman i kirapim pinis bilong givim moa mani i go long ol distrik, tupela i mekim wankain wok, tasol asua bilong dispela bikpela distrik developmen program, em i gat planti politiks tumas i stap insait long en.

Long ol stori bilong ol lain manmeri bilong ples husat i kisim pinis skul long dispela IFS program, em i klia olsem em i wok karim kaikai.

Na bikpela distrik developmen program bilong gavman, ating sapos yumi rausim olgeta sans bilong pasin politiks i go insait long en, bai em i ron gut.

Nau yet em i bam na stap.



Skulim pipel long Kabon Treding

KABON Treding em wanpela nupela samting we yumi ol pipel bilong Papua Niugini i no save long en na dispela samting em bai kamap long bus graun bilong yumi stret we yumi papa long en.

Dispela samting Kabon Treding em ol saveman bilong ovasis na liklik lain tasol long Papua Niugini i save long en, olsem na gavman i kamapim pinis wanpela opis o Dipatmen we i go pas long en. Dispela Dipatmen em ol i kolim Office Of Climate Change na em stap long Mosbi.

Bikpela as tingting em dispela samting Kabon Treding em bai kamap stret long bus bilong yumi na yumi ol pipel bilong ples i no save o klia tru long dispela samting.

Yumi save harim stori olsem insait long dispela ples graun tude, planti bikpela smok nogut i go antap pinis na bagarapim klaut olsem na ples graun nau i wok long go hot na kamapim planti hevi na bagarap long planti hap kantri long wol tude.

Yumi harim na ritim long nius olsem bikpela ren na tait wara i wok long bagarapim planti ples na bagarapim laip na sindaun



bagarapim long skai nau i nogat strong long holim bek o banisim ol strongpela hot win na lait. Ol dispela hot win na lait wok long kam daun long ples graun na bagarapim yumi nau. Em bikos ol smok nogut bilong ol bikpela fektori na masin i pulap long klaut nau na bagarapim strong bilong klaut o skai long stopim ol dispela lait na hot nogut.

Dispela hevi em kamap olsem bikpela toktok nau insait long wol tude we olgeta bikpela lida bilong olgeta bikpela kantri wok long sindaun na toktok long wanem samting yumi mas mekim long stopim o sloim ol

bagarap long noken kamap bikpela.

Wanpela rot nau em ol kantri we i gat bikpela bus olsem yumi long Papua Niugini mas mekim sampela samting nau. Em long yumi lukautim gut na banisim gut ol bus na diwai bilong yumi long kamapim moa win ol kolim oksigen (oxygen) long go antap long traim klinim klaut o helpim klaut long wok gut na stopim ol dispela lait nogut long kam insait long ples graun.

Lukluk nau em long yumi long Papua Niugini na sampela kantri long wol long lukautim na banisim gut ol diwai na bus bilong em long helpim dispela bikpela hevi nau i kamap long ples graun.

Em nupela samting long yumi ol liklik manmeri bilong Papua Niugini.

Gavman bilong yumi bin kamapim wanbel pinis long mekim dispela wok bilong planim moa diwai, banisim ol bus graun long noken bagarap we ol kolim Kabon Treding.

Dispela Kabon Treding bai i no inap kamap long wanpela hap. Em bai kamap stret long

bus na graun bilong yu stret. Olsem na gavman mas go aut nau na skulim olgeta pipel bilong yumi long ples long wanem samting em mas mekim nau long helpim wantaim dispela bikpela hevi insait long wol.

Yumi harim olsem sampela saveman na wanwan Papua Niugini i gat save long dispela olsem na ol wok long pairapim toktok long dispela.

Ating em samting bilong ples lain we graun na bus i stap long han bilong ol olsem na gavman mas wok klostu wantaim ol nau long wanem samting ol mas mekim long planim moa diwai o noken bagarapim bus graun o banisim bus graun stap gut na ol arapela wok moa bilong helpim long kamapim dispela gutpela win ol kolim Oksijen.

Sapos dispela samting i ken kamap olsem projek bilong mekim mani long en, orait larim stap long han bilong ol ples lain yet long pas long en. Ol saveman bilong gavman ken go na skulim ol na stiaim ol wantaim tingting bilong wanem samting ol mas mekim.



Published Weekly, Thursday, for
Word Publishing Company, Ltd,
P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Neville Choir

Published at
Section 58, Allotment 3
Office 2, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms and conditions are available at Word Publishing Company Ltd and are set out in the display advertising form.

Nau em i taim long painim tru tru PNG Nesenel Antem

O Arise All Ye Sons of This Land' i no nesenel antem bilong PNG; dispela i min olsem long 34 yia independens, yumi nogat wanpela bilong yumi yet

"NOGAT, nogat, nogat. "O Arise" em i no wanpela nesenel antem, God Save The Queen em nesenel antem. PNG i nogat nesenel antem. Em i gat nesenel song tasol," em Se Peter Barter, siaman bilong Nesenel Ivens Kaunsil long 2005 i bin tok insait long wanpela kibung long painim wanpela nesenel antem na het tok bilong namba 30 Independens Anivesari selebresen.

Tasol em i tru. Planti long ol pipel bilong yumi i ting olsem dispela singsing em i nesenel antem bilong yumi. Ol redio anaunsa i save tok olsem, ol mana ov sere- moni i save tok olsem, na ol tisa long olgeta hap kona bilong kantri i save tokim ol sumatin olsem dispela em i nesenel antem bilong yumi.

Na long taim yumi kisim independens, olgeta manmeri i bilip olsem dispela em i tru tru nesenel antem bilong yumi.

Long dispela as tasol, na ating dispela singsing i no kisim gut luksave bilong olgeta manmeri bilong kantri. Long wanem, em i kamap olsem wanpela narapela singsing tasol.

Sapos yu traim tokim ol skul sumatin long sanap atensen long taim singim "O Arise All Ye Sons Of This Land", na bai ol i sanap pilpilai wantaim ol pinga bilong ol, sikirapim het bilong ol, na ol i no inap bisi tumas long apim het na lukluk long flek wantaim han bilong ol i silip antap long bros na lewa bilong ol.

Em i kamap wanpela narapela singsing tasol.

Ol arapela i no save na i no wari sapos em i nesenel song o nesenel antem. Ol i no save wari long rausim ol kep long het bilong ol, bai ol i kaikai buai na toktok i go kam taim singsing i go het, na ol i apim flek bilong yumi.

Na moa yet, planti ol biklain, ol bikipela savemanmeri, ol politisen, hetmanmeri bilong ol gavman dipatmen, ol bisnis bosman, jeneral menesa na ol dispela biklain, sapos ol i sindaun long wanpela hap na yu askim ol long singim dispela singsing, bai wan wan long ol tasol i save long olgeta wod bilong dispela singsing.

Maus bilong ol bai meknais, tasol ol i no wari wanem samting ol i singsing bihainim.

Em i bikipela sem tru ya, na mipela gat 34 krismas tasol.

Mi ken tokim yu olsem taim mi stap long praimer skul long Bogenvil long 1960s, man, pasin disiplin na harim tok i bin strong



Resim fleg seremoni long 34 Independens Krismas long Independens hill. Foto: Nicky Bernard



tru. Em i strong long onaim flek bilong Australia, na onaim Nesenel Antem (God Save The Queen). Na ol i amarim i go insait long ol het bilong mipela inap mipela i save long en gut tru.

Olgeta moning long olgeta skul de, olgeta yia, ol peris pris, wanpela Jeman, wanpela Amerika na narapela em wanpela Kanada na ol lokol tisa bilong mipela, em ol sister, i save mekim mipela i sanap na salutim flek bilong Australia taim mipela i singsing God Save The Queen. Sapos san i kukim yu na olgeta bun long lek bilong yu i slek, bai yu kisim kanda. Tru tumas, mi bin kisim skel bilong mi long dispela ol kanda ya.

Nogat wanpela i mov, holim nus, sikirapim het. Olgeta skul pikinini long Bogenvil i save sanap stret tasol long Bogenvil, olsem ol i bihainim wanpela lo. Na maski em i wanpela flek bilong narapela kantri, mipela i rispektim, wantaim nesenel antem.

Yu bai no inap go insait long kalsrum inap flek i go antap. Olgeta wan wan sumatin bilong ol Bogenvil skul i sanap atensen na lukluk stret i go long flek taim em i ron i go antap long flek pos.

Mi save na bilip olsem long olgeta arapela hap bilong kantri, wankain samting i kamap olgeta moning taim ol i resim flek na singim God Save The Queen.

Tasol tude, em i narakain olgeta. I nogat moa rispek long olsem mipela i bin gat bipo. I nogat moa rispek bilong flek o nesenel antem bilong mipela.

Orait, inap mi tokaut olsem nau em i taim bilong yumi long stretim dispela asua na stat long soim rispek long dispela ol samting?

Mi bai helpim yu, na wantaim luksave long Tom Shaklady, mi raitim daun gen ol wod bilong dispela singsing.

O arise all yet sons of this land

Let us sing of our joy to be free

Praising God and Rejoicing to be Papua New Guinea

Shout our name from the mountains to sea

Papua New Guinea

Let us raise our voices and proclaim

Papua New Guinea

Now give thanks to the good Lord above

For his kindness, His wisdom and love

For this land of our fathers so free

Papua New Guinea

Shout again for the whole world to hear

Papua New Guinea

We are independent and we're free

Papua New Guinea

Kisim dispela ol wod bilong singsing na stikim long dua bilong bokis ais o insait long haus bilong yu bai olgeta long famili i ken ritim na luksave long en. Na taim yu lainim nesenel song pinis, yu mas salutim PNG flek. I no olsem salut bilong ol ami, tasol insait long lewa bilong yu.

Hamas moa yia i mas lus bai ol Papua Niugini manmeri i sanap

makim gut kantri bilong ol, na givim luksave long flek, na nesenel singsing.

Na i no long taim i go pinis long independens dispela yia, taim wanpela meri redio anaunsa i wok stori long ol i resim flek long independens hil, em i no soim rispek taim ol i pilaim nesenel antem. Nogat. Em i toktok i go yet. Na em i wanpela savemeri husat i kisim skul ya.

Yumi mas traim na soim rispek long nesenel song na flek bilong yumi. Em ol nesenel piksa bilong mipela ya. Soim rispek long pasin na luksave.

Wanpela sinia pablik sevan husat i sanap nating, nektai bilong em i no silip stret, na i stori na lap wantaim meri i sanap klostu long em taim ol i pilaim nesenel song. Na meri ya i no tingting long rausim kep bilong em olsem sain bilong soim rispek taim ol i apim flek na singim nesenel song. Kain pasin olsem i soim olsem ol i ting em i narapela singsing olsem ba ba blek sip tasol ya.

Ol yangpela bilong tude i no save long hatwok long kantri long taim gavman i kirapim ol resis long painim wanpela singsing i gat ol wod i ken strongim dispela bilip na tingting bilong sanap inidipenden.

Taim kantri i wok redi long namba 30 independens anivesari bilong en fopela yia i go pinis, gavman i bin askim Nesenel Ivens Kaunsil long kamapim wanpela singsing i soim tru ol gutpela samting i bungim wantaim kantri na pipel bilong yumi.

Aninit long siamansip bilong Sir Peter Barter, kaunsil i bin traim mekim wanpela resis gen long painim wanpela nesenel antem bilong PNG. Tasol dispela i no karim gut kaikai. Em nau ol i askim Barike Ben long rekodim gen singsing WAN KANTRI.

Nau, dispela singsing, em planti ol redio anaunsa i tok em i nesenel antem bilong PNG long 17 krismas pinis.

Tru, dispela singsing i bin kraigut na i makim tru kantri. Tasol Wingti i no moa stap long pawa na i no bin gat inap kik long taim em i bin kamaut namba wan taim.

Planti toktok i bin kamap olsem dispela singsing i bin winim ileksen bilong Pais Wingti olsem praim minista, na sampela moa i tok Barike i bin raitim bilong Wingti long kempen long en. Nogat tru.

Singsing em leit Glen Low i bin raitim, na i no bilong kamap nesenel antem.

Long 2005, mi bin harim Sir Peter Barter i tok planti taim tru olsem kantri i nidim wanpela nesenel antem. Mi bin stap makim Midia Kaunsil bilong PNG long Ivens Kaunsil bilong namba 25 na 30 independens anivesari.

"Tasol Siaman, mipela i gat 'O Arise' pinis. Mipela i no nidim wanpela nesenel antem." Tasol Sir Peter i bekim isi tasol. "O Arise em i wanpela nesenel song. I no nesenel antem. Olsem na ating kaunsel i mas mekim wanpela narapela resis gen long painim nesenel antem.

Sir Peter i bin save olsem i no gutpela long tromei mani nating taim kaunsel i no bin gat inap taim long painim wanpela nesenel antem. Na nau yet, em i gat wankain bilip yet, olsem mipela i mas gat wanpela nesenel antem.

Sir Peter bai stori wantaim mipela neks wik taim yumi pulim wokabaut bilong yumi i go yet long painim wanpela nesenel antem bilong PNG. Wantaim rispek na luksave long flek bilong yumi na strong bilong Nesenel Pleds o tok promis we yumi planti save kolim nating tasol.

EM NAU: Dairekta bilong PNGSDP, Lawrence Acanufa, Tas Tim Lida bilong Wol Benk, Oliver Braedt, Wes Nu Briten Gavana Peter Humphreys na Menesing Dairekta bilong PNG Maikrofainens Paul Thornton i sanap wantaim sekmani bilong ol welpam growa.



K17.8 milian bai strongim ol welpam growa long Oro na Wes Nu Briten

MOA long 4,000 nupela Wel Pam Growa insait long Oro na Wes Nu Briten provins bai kisim K17.8 milian aninit wangepa dinau program bilong PNG

S a s t e n a b e l Dvelopmen Program (PNGSDP) na han bisnis bilong en PNG Maikrofainens Limitet (PML).

na em i bikpela samting long sapotim dispela faming sekta.

"Mipela i bilip olsem dispela projek bai stretim bikpela hevi i stap long ol welpam smolholda. Hevi em olsem i nogat ol gutpela rot i stap. Nau mipela i wokbung, mipela i ting olsem dispela projek bai kamapim mobeta rot bilong mipela. Em bai no inap kamap wantu tasol. I gat bikpela hap wok i stap yet."

Em i tok wangepa samting ol i mas mekim pastaim, em long groim planti moa welpam.

Dispela mani bai go long lukautim ol welpam blok long Hoskins, Bialla na Popondetta long narapela tripela o faivpela yia i kam.

"Mipela i bilip olsem bai wok planim i kirap pastaim long mun Epril neks yia. Mipela i amamas long stap insait long dispela projek. Mipela i save olsem ol yangpela famili bai yusim gut tru mani bilong mipela, long staitim ol bisnis bilong ol yet. Em i no wangepa presen, tasol em i mani we ol lain i kisim i mas bekim wantaim hatwok," Mista Acanufa i tok.

SADP bai lukluk long stretim ol bikpela hevi ol welpam groa i save karim long:

- mekim gut wok stretim long ol rot, na bungim mani bilong lukautim ol rot;
- skelim mani bilong ol liklik komyuniti grent, ol teknikal halivim na trening i go long ol Lokol Level Gavman na ol lokol grup long strongim wok bilong givim servis i go insait long tupela provins.

● Ol ekstensens evis i stap long strongim wok bilong ol smolholda. na

" Wel pam Industri Koporesen (OPIC) i gat strong bilong menesim gut olgeta dispela SADP program na long strongim save bilong em long givim aut long ol smolholda.

PNG Maikrofainens bai givim wankain manimak em yet.

Dispela 17.8 milian kina em ol PML brens long kantri bai givim olsem dinau long ol nupela smol holda welpam growa i stap pinis insait long ol welpam projek eria long Oro provins na Hoskins na Bialla insait long Wes Nu Briten provins.

Dispela welpam dinau program em i wangepa hap bilong narapela bikpela program ol i kolim Smolholda Agrikalsa Dvelopmen Projek (SADP), wangepa wokbung bilong PNGSDP, Welpam Industri Koporesen, Gavman bilong PNG na Wol Benk.

Aninit long dispela SADP, i gat bikpela luksave long ol envairomen na ol hevi komyuniti i save karim.

Dairekta bilong PNGSDP, Lawrence Acanufa, i givim wangepa piksa sekmani inap long mani mak K8.9 milian olsem kontribusen bilong PNG Maikrofainens i go long Menesing Dairekta bilong PNG Microfainens Paul Thornton las wik Fraide long Kimbe.

Wes Nu Briten Provins Gavana, Peter Humphreys, Deputi Gavana Tony Puana, Administreta Steven Raphael, na ol mausman bilong lokol level gavman na ol growa na tu ol lain bilong Wol Benk na ol Welpam kampani i wok long provins i bin stap tu.

Mista Acanufa i tok ol dairekta bilong PNGSDP i gat bikpela bilip long kirapim rural sekta.

Long wanem, em i no olsem maining sekta we i no inap stap long taim, na agrikalsa sekta em i baksait bun bilong PNG ekonomi.

Em i tok agrikalsa tasol bai inap apim mak bilong sindaun bilong ol pipel, olsem



TOKSAVE

Defens Fos Ritaiamen Benefit Fan Toksave na Wok Painimaut

Dia Ol Momba

Komreid Trasti Sevises LTD (CTSL) i wok long kamapim senis insait long Defens Fos Ritaiamen Benefit lo buk.

Long luksave olsem CTSL i kisim tingting bilong ol memba, husait em ol pensena na ol wokman bilong Defens tu, mipela laik tokaut olsem bai mipela holim ol bung long skulim ol pensena na wokman tu long ol kain kain makmak bilong ol wantain fan. Mipela long CTSL Member Services bai hamamas lo lukim yupla lo dispela ol bung.

Blhain taim bai mipela lukluk long holim ol dispela bung long highlands na ol narapela hap we mipela ino karamapim yet. Dispela bai kamap long 2010.

As tingting em:

Supaenuasen Wok Painimaut

Long kisim tingting bilong ol pensena na wokman bilong Defens, mipela bai hamamas sapos olgeta i kamap long ol dispela bung na pulumapim tu ol pepa long toksave long wanem kain ol senis yupela laik lukim kamap long fan bilong yupela.

Olsem mipela toksave pinis antap, bai mipela hamamas long lukim yuplea long ol dispela bung. Sapos yumi wok bung wantaim bai yumi ken lukim senis ikamap long fan long halivim sindaun bilong yupla long behain taim.

Tamblo em ol ples we mipela makim long holim dispela ol bung.

Tenkyu
Siaman

Site	Deit	Ples bilong woksop - NCD tasol	Taim
Site 3	1 - 3/09/09	Goldie Barracks	10.00 am
Site 4	7 - 8/09/09	Basilisk	9.30 am
Site 5	10 - 11/09/09	ATS (air Squadron)	9.30 am
Site 6	De bilong ol Pensina 22/09/09	Mari Bareks (Ben Moide Klab)	10.00 am
Site	Deit	Ples bilong woksop - Ol narapela senta	Taim
Site 6B	Ol Pensina - 28/09/09	Igam Bareks -Lae (RSL)	10.00.am
Site 7B	Ol Pensina - 07/10/09	Moem Bareks (Wewak)	10.00.am
Site 8B	Ol Pensina - 14/10/09	Tarangau (Manus)	10.00.am
Site 10 B	Ol Pensina - 28/10/09	Vanimo Detasmen (W.S.P)	10.00.am
Site 11	Ol Pensina - 06/01/09	Kimbe (Liamo Resort, W.N.B.P)	9.00 am



RONAWE: Winga bilong PNG anda 16 tim i kisim wanpela lus bal na i ron i go long putim laspela trai bilong ol agensim Nu Saut Wels (NSW) anda 16 tim bilong Australia long Mosbi las wik Sande. PNG i win 38-22. POTO: Andrew Molen.



LUKAUT: Dispela pilaia bilong ATW Skyhawks i kalap i go antap long kikim bal na birua bilong em bilong Murat i kisim was long het bilong em long divisen 1 semi fainol gem bilong ol meri long Mosbi soka resis. POTO:



AI OP: Presiden bilong ABG, James Tanis (nanel) i bin amamas tru taim em i gat sans long bungim Mal Meninga (lephan) na Brad Fittler bilong Australia PMG 13 tim las wik Fraide. Ol i givim em na ol arapela bikman, sampela yunifom bilong tim. POTO: Andrew Molen

OL WIKEN SPOT DRO

PORT MORESBY SOCCER ASSOCIATION

SEMI FINAL DRAW

SUNDAY 04TH OCTOBER 2009

Telikom Park - Bisini 1


TIME	DIVISION	FIXTURES	
8:00	Y2	GURIA	VS NNL MUSA LTD
9:00	D4	BINIKU	VS MOROBE UNITED
10:30	3/4 PLAY OFF - Y2	PNG FIRE	VS LOSER GURIA/NNL MUSA
12:00	3/4 PLAY OFF - D4	NANIU	VS LOSER BINIKU/MOROBE UTD
2:00	W1	MURAT	VS MUNGKAS
3:30	D2	KELEIRUNA	VS MUIAH BROTHERS

Telikom Park - Bisini 2

TIME	DIVISION	FIXTURES	
8:00	Y3	BAVAROKO	VS CSU THRILLERS
9:00	D3	DBTI	VS KUMUSI
10:30	3/4 PLAY OFF - Y3	KURTI ANDRA	VS LOSER BAVAROKO/CSU THRILLERS
12:00	WP	PNG GARDENER	VS MUNGKAS
2:00	3/4 PLAY OFF - D3	MIGA	VS LOSER DBTI/KUMUSI
3:30	D1	CSU THRILLERS	VS LBC DEFENCE

Semi Finals & 3rd/4th play off

bemobile PAINIM BAL RESIS!



Putim mak (X) long wanem hap yu ting bal i stap long en na salim i kam long:

Bemobile PAINIM BAL RESIS WANTOK NIUSPEPA
P.O. Box 1982 Boroko, NCD Port Moresby.

Bai yu gat sans long winim **sampela gutpela prais** i kam long Bemobile na **K100** i kam long Wantok Niuspepa long wanwan mun.

Lo bilong resis: Ol wokmanmeri bilong Wantok Niuspepa no inap pilai long dispela resis. Wantok Niuspepa tasol bai i makim wina. Nogat potokopi. Taim bilong dro em bihain long foapela wik bai ol i droim wina na nupela pilai bai i stat gen. Nem bilong wina bai kamaut long pepa neks wik bihain long dro.

bemobile WANTOK

Nem:.....Krismas.....
Atres:.....
Phone namba:.....
Yu baim pepa long we?
Long strit/ rot/ stua:.....



Katim na salim i kam



bemobile Kap Nius

Sans bilong Kambange long bemobile kap

Stella Bita bilong bemobile i raitim

BIPO long em i pilai, Sakias Kambange i save karim bal bilong fevret tim bilong em i go insait long gem taim ol i laik pilai.

Nau em yet i stap insait long dispela tim olsem huka bilong ol insait long bemobile kap resis we i bikpela ragbi lig resis bilong Papua Niugini (PNG).

Dispela em i ken laki bilong em o bikman yet i putim em long kamap olsem.

Tasol dispela em wok-about bilong Kambange husat i gat 24 krismas na i bilong long ples Butuwin long Kokopo, Is Nu Briten provins.

Kambange i joinim tim dispela yia na i wanpela strongpela pilaia husat i helpim tim bilong em, Agmark Gurias, long winim maina primiasip taitol dispela yia.

Mi bin painim aut long stori bilong dispela yangpela man taim mi toktok wantaim wanpela wanwok bilong Nesenel Brodcasting Komisnin (NBC) tupela i wok go

pinis bihain long gem bilong Gurias agensim Masta Mak City Rangers long Mosbi.

Mi bihainim Kambange taim em i wokabout i kam abrusim mipela na i go na kisim dispela liklik stori bilong em.

Mi painim aut olsem Kambange em i no man bilong toktok planti tumas, tasol olgeta toktok bilong em i save kamap insait long pilai bilong em.

Kambange em isipela man bilong ples husat i save wokhat long mekim kopra na kakau long famili blok bilong em.

Tasol bipo long em i putim yunifom bilong Gurias, Kambange i pilai long anda 19 tim bilong Kokopo Muruks na long wankain taim i save karim bal bilong ol tim long primia divisin long Kalabond oval.

Dispela em long 2005. Long 2006 em i bung wantaim sampela ol arapela pilaia na ol i go long Kavieng long pilai insait long Gavana's Kap resis.

Sampela wokman bilong Gurias i bin stap long hap long painim sampela ol gutpela nupela pilaia na ol i lukim Kambange na kisim em i

go insait long developmen skwat bilong ol.

Em i no bin pilai insait long dispela primia tim yet tasol i bihainim ol yet olsem bal boi tasol long 2007 na i no ting olsem em bai holim posisen olsem huka bilong tim.

Wanpela taim em i mekim wok bilong em long karim bal bilong tim i stap na hap bek, Geno Kima i kisim bagarap na ol i singautim Kambange long putim yunifom na go insait long fil.

Ol i surikim Ronnie Matalau i go long hap bek na Kambange i go pilai huka.

"Sakias (Kambange) i kam nupela na i pilai gut tasol mipela i laikim em i ron moa long dami hap," tim mensa bilong Gurias, Ted Vere i tok.

Em i strongpela yangpela man husat i no save abrus long mekim takol tasol hap bek na huka em ol bikpela posisen insait long gem, ol i save mekim ol fowet i ron i go antap moa, Vere i tok.

Em i tok Kambange i gat planti moa gutpela stail bilong pilai stap.

Vere i tok ol i gat gutpela tingting long helpim

Kambange i pilai gut moa long posisen bilong em.

Em i bilip Kambange bai lainim planti gutpela samting long dispela tim long wanem kosa bilong em, Michael Marum, i save pilai huka bipo.

Vere i tok tu olsem bemobile

PILAI: Kambange i save karim wara bilong tim tasol nau em i holim wanpela bikpela posisen. *POTO: Stella Bita/ bemobile.*

kap resis i wok long kamap strong olgeta yia na olgeta manmeri, spon-sa na ol tim tu i lainim planti samting yet.

Em i amamas tu olsem Gurias i stap insait long ol fainel olsem ol maina primia.

Vere i tok olgeta wok redi bilong ol long bikpela semi fainel resis dispela Sande i ron gut tasol.

Olgeta manmeri bai lukluk long ol taim ol i go

insait long fil na Kambange tu bai putim dispela grin, red na wait kala yunifom wantaim namba 9 i pas long bak-sait bilong em.

MALOLO: Kambange i ken lainim palnti samting long kosa bilong em Michael Marum husat i bin huka bipo. *POTO: Andrew Molen.*



Rangers (green) vs Lahanis in Port Moresby. Lahanis win 38-26. *PHOTO: A. Molen/ Wantok.*

Muruks pinis long resis

Andrew Molen i raitim

SANS bilong SBS Muruks long winim namba 4 taitol bilong ol long Papua Niugini Nesenel Ragbi Lig (PNGNRL) i pinis taim ol i lus 18-14 long Masta Mak City Rangers long Hagen las wik Sande.

Muruks i pait strong long sisen na i kam bek long kisim wanpela ples insait long ol fainel resis tasol i pundaun sot long han bilong ol Rangers.

Rangers nau bai

bungim Bintangor Lahanis long pait long kisim wanpela ples long gren fainel na Bintangor Lahanis bai kisim Agmark Gurias long narapela ples long gren fainel.

Lahanis i bin strong tumas long Mioks las wik long Lae long winim ol 11-8 long wanpela gem we i pinis wantaim bikpela pait namel long ol sapota.

Kevin Inagafa na Hasler Soso i skoa pas long kisim Lahanis i go pas 10-2 wantaim kik bilong huka Walter Hasu

bipo long hap taim.

Tasol long namba tu hap bilong gem, Mioks i kam bek strong na i bekim wanpela trai tasol Lahanis kepten, Nigel Hukula i pasim dua wantaim wanpela fil gol long pinisim gem.

Dispela bikpela pait long Lae i lukim wanpela polisman na pilaia bilong Lahanis i kisim bagarap long han bilong ol sapota.

Dispela em i namba tu taim bilong kain bikpela pait i kamap long bemobile kap long Lae.

Mista PNG trainim wol

Nem: Lucas Wemin

De mama karim: Jun 15, 1976.

Hevi bilong em: 75kg (long wol taitol bai mi pilai long 65kg).

Longpela bilong em: 160 cm.

Provins: Kanamaina klen, ples Kureiri, Simbu.

Hamas yia long dispela spot: 10.

Fevret intanesenel bodi bilda: Rodney Coleman.

Fevret PNG bodi bilda: Jack Yagi.

Fevret kaikai: Kakaruk na kiau bilong kakaruk.

Fevret dring: Diet Coke.

Narapela spot yu save laikim: Ragbi lig.

Astingting na samting yu laik kamapim: Long putim PNG long wol mep.

Wanpela bikpela salens bilong yu: Long painim inap mani long helpim wantaim trening na kaikai bilong mi.

Liklik toktok long ol yangpela: Pilai wanpela spot na mekim yu yet bisi. Trainim long kamapim gutpela man o meri bilong kantri bilong yu. Pilai strong na makim kantri bilong yu na bungim sampela nupela poroman long PNG na arapela kantri tu.



TAITIM: Wemin i laik soim PNG long wol taim em i go pilai long Dubai long Novemba. - POTO: Andrew Molen.

Andrew Molen
i raitim

LUCAS Wemin bai taitim masol bilong em long Dubai long Novemba dispela yia taim em i trainim long kisim wol taitol bilong bodi bilding i kam bek long Papua Niugini.

Dubai em i stap long Yunaited Arab Emrets (United Arab Emirates) o UAE na pilai bai kamap long Novemba 3 i go long 7, 2009.

"Wanpela tingting bilong mi tasol em long winim dispela taitel na mi amamas long karim fleg bilong kantri long dispela intanesenel pilai," Wemin i tok.

Dispela bai namba wan taim bilong Wemin long go long dispela tonamen na em i stat nau long redim bodi bilong em long dispela salens.

Wemin i winim Mista PNG taitol long Jun dispela yia long 75kg divisen long nesenel sempionsip long Mosbi.

Em i save resis long 75kg tasol long wol taitol bai em i pilai long 65kg.

"Dispela i min olsem mi mas rausim sampela hevi tasol holim sais na strong bilong bodi bilong mi stap wankain," Wemin i tok.

Em i stap insait long dispela spot inap 10-pela yia olgeta na i tok hatwok bilong em i karim kaikai nau.

"Mi yusim poket mani bilong mi yet long redi long redi long mista PNG taitol tasol wol taitol em i bikpela moa na mi askim sapot bilong olgeta manmeri na ogenaisesen long helpim," Wemin i tok.

Em i laikim helpim tasol long sait bilong kaikai bilong em.

"Mipela i save lukaut long wanem samting mipela i kaikai taim mipela i laik go pilai na dispela i save kos bikpela mani tu," Wemin i tok.

Em i tok asosiesen bai lukautim wokabaut bilong em tasol em yet i mas painim mani long kaikai na trening bilong em.

Wemin bai go long dispela tonamen wantaim presiden bilong PNG Body Building Federation, Ronald Haihavu husat bai kamap olsem wanpela jas long dispela pilai.

Husat sponsa i laik helpim Wemin i ken ringim em long 716 05 298.



Gem bilong ol fulbek

Andrew Molen i raitim

Al bilong olgeta manmeri pas long fulbek bilong Parramatta Eels, Jarryd Hayne na bilong Melbourne Storm, Billy Slater long NRL gren fainol dispela Sande long Sydney.

Hayne na Slater wantaim i wok long pilai strong bilong tim bilong ol.

Spit bilong tupela namel long fil na long taim ol i kisim spes em i bikpela tru na stail bilong ol long holim bal na painim spes em i wankain tu.

Tupela wantaim i ken was gut long baksait tasol bikpela strong bilong ol em taim ol i holim bal na painim rot long putim trai.

Slater em i gutpela long kisim bal long ol wanpilai bilong em na ron i go insait long spes tasol Hayne i save sanap na raun nating inap em i lukim wanpela spes na bai kisim bal na kik, ron o givim long narapela pilaia i go insait long dispela spes.

Namel long tupela, Hayne i stap long gutpela fom dispela yia we i lukim em i winim tu "Dally M" awod we i soim olsem em i namba wan pilaia insait long NRL dispela yia.

Tasol long wankain taim Slater, husat i holim namba wan jesi bilong Australia Kangaroos i strong yet long gem bilong em na dispela

Sande bai gutpela salens i kamap long tupela.

NRL komiti bilong gem, long Mande dispela wik i givim tok orait long Hayne long pilai bihain long refri putim em na wanpilai, Mathew Keating long ripot las wik long gem bilong ol agensim Canterbury Bulldogs.

Tupela wantaim bai pilai dispela Sande agensim Storm.

Ol i ripotim tupela long wanpela takol nogut ol i mekim insait long gem las wik. Komiti tok ol i lukim olsem i nogat inap asua i stap insait long dispela takol long givim mekim save long Hayne na Keating.

Sif eksekutiv opisa (CEO) bilong Eels, Paul Osbourne i tok amamas olsem Hayne bai pilai bilong wanem em i save ol bai painim hat sapos Hayne ino pilai.

"Ating mipela bai painim hat liklik sapos em ino pilai.

"Em i wanpela gutpela pilaia bilong mipela dispela yia na sapos em ino pilai bai mipela i gat hevi agensim Melbourne husat ol i gat planti gutpela pilaia," Osbourne i tok.

CEO bilong Storm, Brian Waldron tu i tok amamas olsem Hayne bai pilai.

"Ol gutpela pilaia i save mekim gutpela gem," Waldron i tok.

"Mi ting em i gutpela bilong gem long lukim olsem tupela wantaim bai pilaia," em i tok.

Melbourne kepten, Cameron Smith tu i amamas olsem Hayne bai pilai bilong wanem las yia em i bin bungim wankain hevi na ino bin pilai agensim Manly Warringah Sea Eagles long gren fainol.

"Mi no laik wankain hevi i kamap long ol arapela pilaia na mi amamas olsem Hayne bai pilai bilong Parramatta dispela Sande," Cameron i tok. Em tu i bilip dispela bai wanpela gutpela pait namel long Slater na Hayne.

Melbourne i bin winim gren fainol long 2007, las yia ol i go tasol i lus long Manly na nau ol bai traime gen agensim Parramatta.

Laspela tai mol Eels i go long gren fainol em long 2001 na i bin lus long Newcastle Knights.



FOM: Hayne i stap long gutpela fom na bai givim gutpela salens long Slater.



NAMBA WAN: Slater em fulbek bilong Kangaroos tasol em bai bungim bikpela salens long Hayne dispela Sande.

Barrett stap long Kangaroo skwat

OL i ting em i lapun pinis tasol gem bilong Trent Barrett i gutpela inap long winim ples gen insait long Kangaroo trening skwat.

Cronulla Sharks kepten, Barrett i no bin pilai long las 6-pela gem bilong tim bilong em bihain long bun long pes na ai bilong em i bruk liklik.

Em i orait nau na ol i singautim em i go insait long Australia skwat we i wok long trening long 4 Nations salens we Australia, Nu Silan (New Zealand), Gret Briten (Great Britain) na wanpela tim bilong Pasifik bai stap insait long en.

Brisbane fowet, Dave Taylor na Nick Kenny tu i stap insait long skwat wantaim Israel Folau, Justin Hodges, Darren Lockyer na Sam Thaiday husat ol tu bilong Brisbane Broncos.

Michael Ennis, Ben Hannant, Josh Morris na David Stagg bilong Canterbury Bulldogs tu i stap insait long skwat.



WIP YET: Barrett i kisim singaut long stap insait long Kangaroo skwat.



Strongim sekyuriti bilang gem

Senisim pasin long strongim gem

PAITIM: Dispela polisman i paitim wanpela man bihain long man ya i kalapim banis na ron i go holim pasim Jonathan Thurston.

Andrew Molen i
raitim

PLANTI manmeri toktok long pasin ol polis i mekim taim ol i kamap long was long dispela gem namel long Papua Niugini Praim Minista 13 Kumuls na Australia PM's 13 Kangaroos las wik Sande long Mosbi.

Polis i mekim gutpela wok long lukautim ples we nogat hevi kamap tasol ol ino isi long paitim sampela sapota husat i kalapim banis i go insait na holim ol fevret pilaia bilong ol.

Ol manmeri ting olsem ol polis ino mekim gutpela pasin

long paitim ol, ol i bilip olsem polis i ken holim ol dispela lain na rausim ol i go aut-sait tasol ol i noken paitim ol olsem ol i mekim bikpela raskol pasin.

"Mi no amamas long ol polis, ol i giman long painim ol mangi nating," wanpela man i tok.

Metropolitan komanda superintenden (Metropolitan Commander Superintendent) Fred Yakasa i tok tu dispela ol polisman i bin asua long paitim ol sapota olsem.

i go moa long Pes 31...



POTO: ANDREW MOLEN.



INSAIT:

PNG winim vot long holim 2015 Pasifik gems. **Pes 31.**

■ Gren fainol salens bilong Slater na Hayne. **Pes 30.**

Mitsubishi Rosa Bus Diesel



Engine upgraded
130 Hp
4 cylinder disel

Dispela em spesol offer wantaim limited units istap throughout long kantri



PIKSA EM BILONG ILLUSTRASEN WOK TASOL

K125,000
draiv awei

Act nau na kam lukim Boroko Motors dealership

offer bai pinis 30th November 2009 or inap stock i pinis

BOROKO MOTORS

PORT MORESBY Ph: 325 5255 LAE Ph: 472 1144 MT HAGEN Ph: 542 1933 RABAU Ph: 982 8193
KIMBE Ph: 983 5035 TABUIL Ph: 548 9048 MADANG Ph: 852 2659

Email: info@borokomotors.com.pg
Website: www.borokomotors.com.pg

